

De Müsejiarger

Husdüarn tou, et wät kault, un dann kommt de Müse in't Hus. Dat Austüg kann vell Schaden anrichten.

Äinmaul häwwwe ick owwer erliarwet, dat'n Mus ock Nutzen doun kann, sogar wenn se daute is.

ICK ging met Pundmann des Moarns ümme neggen Uhr no de Schoule. De Religionsunnerricht fell ut, weil Rektor Hark krank was, un wi han'n fats bi Niemeyers Schwatten Unnerricht in'n Rerken. Pundmann (he hadde dössen Spitznamen, wiel he son derben kotten End was) was gans traurig. He hadde moll we vogerten, to Hus sinne Rerkenaufgaben to maken, und hadde Manschetten, dat'n de Schwatte wat achter vo timmere.

Uppe Schoulstraute, an Fißmers Gemöisekeller, lagg ne daue Mus. Pundmann strahle üarwer dat ganze Gesichte un mäine: „Wenn de Dübel inne Naut Fläigen frätt, worümme sall mi dann nich ne daue Mus hölpen könn'n.“ Inne Schouklasse, rechts von dän Schwatten sin Pult, satt ne Gasuhr met'n Holtkasten doümme. Up dössen Holtkasten mogele Pundmann de dauen Mus, un zwar so, dat se von wieten schlecht to säihn was. In dän sölben Moment, öll de Schwatte siar: „Rechenaufgaben vorzeigen“, gaft'n gewaltigen Knall. Pundmann hadde sin'n Griffelkasten, de Dübel mochte wetten, wat he do ölle inne hadde, up dän Holtkasten knallt, dat de Inhalt män so harümme flaug. De Schwatte wör baule von'n Pulte falln, owwer do stund Pundmann öll vo än, hadde de Mus an'n Stärte inne Hand und böлке: „Herr Niemeyer, eine Maus tot geschmissen.“

Wat hadde de Schwatte n' Spaß, dat de Mus daute was. He kloppe dän Pundmann uppe Schullern und siar: „Gotts Himmel ja, Pundmann, du bist der reinste Scharfschütze. Bring dat Tier weit weg und wasch dir dann gründlich die Hände. Die andern zeigen in der Zeit die Rechenaufgaben vor.“ Pundmann woll moll laupen, dat he ute Klasse kamm, un et dur lange, bis he vosichtig ümme de Ecke lur un feststelle, dat Niemeyer met Naukieken förrig was.

„Junge“, siar he, öll wi no Hus gingen, „et is doch gout, dat de

Mensken fo Müse so bange sind, süß hedde de Schwatte woll säihn konnt, dat de Museseele dän Körper öll lange volauten hadde, denn de Mus was öll ziemlich krömmelich. Owwer wecker sick nich to hölpen wäit, de is nich wärt, dat he up Ärn gäiht.“

Pundmann is utwandert no Amerika. He häite met richtigen Namen Sprick un is vo kotter Tied stoarm. Pundmann, wi vogertet di nich.